

Creceamento economico modera pa Aruba den e añanan binidero

Comunicado di Prensa

4 di september 2026

Awe, Banco Central di Aruba (BCA) a publica su “Economic Outlook” di mas recien. E publicacion aki ta contene proyeccionnan economico riba termino corto (2026-2027) y termino medio (2028-2030).

Economia di Aruba a crece cu 6,3% den 2025, y ta proyecta di modera na 3,7% den 2026 y 2,3% den 2027. Den 2026, consumo di hogar, sosteni pa stimulo fiscal y creceamento den empleo, probablemente lo sostiene creceamento economico. Sinembargo, e mercado di trabou preta ta sugeri cu empresanan por depende mas y mas riba labor importa. Turismo tambe lo contribui na creceamento economico, empuha pa un aumento premira den bishitante. Den 2027, un creceamento mas lento premira den consumo di hogar y turismo lo pisa mas cu un aumento den inversion, resultando den un desaceleracion di creceamento economico.

Inflacion probablemente lo acelera for di 0,1% den 2025 pa 2,4% den 2026. E aceleracion aki ta resulta di e tensionnan geopolitico den Medio Oriente, cu lo hisa prijs internacional di petroleo. Consecuentemente, costo di combustible y transporte ta subi, contribuyendo na prijs di gasolin mas halto. Ademá, importacion ta bira mas caro, agregando mas presion inflacionario. Segun cu prijs di petroleo lo baha bek gradualmente, inflacion lo reduci y yega 1,4% den 2027, aunke prijs di cuminda y productonan no relata na energia lo sigui empuha inflacion.

Mirando e incertidumbre den mercado di energia, e “Economic Outlook” aki tambe ta considera un escenario desfaborabel di prijs halto di petroleo te fin di 2027. Den e escenario aki, e impacto economico ta limita den 2026, pero ta bira mas pronuncia den 2027, cu creceamento di Producto Domestico Bruto (GDP) real bahando pa 0,4% y inflacion subiendo pa 4,9%. Prijsnan mas halto ta reduci e poder di compra di hogarnan y ta mengua actividad economico.

Pa e termino medio, BCA ta proyecta cu creceamento lo modera gradualmente, yegando 2,1% den 2028, 1,7% den 2029, y 1,0% den 2030. Sinembargo, e proyeccion ta keda suheto na riesgonan importante, incluyendo desaroyo den demanda turistico, prijs di energia, disponibilidad di labor,

implementacion di inversion, politica fiscal, y condicionnan economico y geopolitico global.

E publicacion completo ta disponibel riba e website di BCA:
<https://www.cbaruba.org/document/economic-outlook>.